

Thursday, March 5, 2026

Time - 2:30pm - 2:35pm

AKASHVANI AIZAWL

REGIONAL NEWS BULLETIN

(MIDDAY)



MNF

MNF Thalai vawiina Aizawl Vanapa Hall kawta pungkhawm chuan Education Minister Dr. Vanlalhlana chu a dept chan te hneh lo leh thildiklo ti a puhin bang turin an phut.

MNF Thalaite chuan a awmna party ZPM MLA Chairman-na hnuaiia Assembly Petitions Committee-in Dr Vanlalhlana Restricted Tender hmanga contractor a thlan dan chu Eirukna lian tak leh dik lo tak a ni tih a finfiah a, cancel an phut angin sorkarin an cancel sak a ni an ti a, a MLA puite pawhin thup ngaihna awm miah loa a thilsual tih cancel leh ngei an phut hi cheng vbc 22 leh nuai 48 chuang daih a ni an ti .

Mizoram State University Bill 2025 Assembly a sawiho laiin NEP 2020 angin Lungleiah Mizoram State University a dah theih loh thu uar takin a sawi a. A thusawi angin bill pawh passed a ni a ni a, kum 1 pawh a liam hmain Cabinet rorel angin Mizoram State University chu Lungleiah suan a nih tur thu a puang leh lawi a, Cabinet rorel anga sawn a nih thu a sawi hnu daihah Cabinet in By Circulation-in an passed leh hnuhnawh tih document atangin finfiah a ni thung a ni an ti a, tum hnih chiang taka Mizoram mipuite a bum avangin a ban an phut tih an sawi a ni.

Minister Dr. Vanlalhlana chu a Dept. chanpualte hneh lo a puhin MNF Thalai te chuan Taxation Dept leh I&PR Dept te chu laksak a lo ni tawh a. ICT Dept phei chu a bo ta emaw tih mai turin a awm mek a. School Education Dept leh Higher Education Dept-te pawh a sawp chhe mek a ni an ti a, kumin Feb ni 26 khan Dr Vanlalhlana chuan ama Office-ah Official te a ko khawmin kum 2026 2027 Academic Session tan hun atan March 23 an ruat a, thawh phut lu hai nei niawma thla khat em pawh inbuatsaihna emaw chawhlawk emaw awm miah loa Sikul kalendar an siam chuan Zoram nu leh pa a ti buai em em a ni an ti a, Academic session ti danglam tur chuan a nghawng tur mipuite inbuatsaihna hun siam sak ngei tur a nih laia thawh phut lu hai nei ang maia a rorel dan avangte, a bik takin kut hnathawktu mi harsa zawkte tana harsatna lian tak a siam avangin Minister atanga bang ngei turin an phut tih an sawi a ni.



MIZOPEX 2026

Ni 2 awh tur Mizopex 2026 -District Level Philately Exhibition chu vawiin khan Aizawl Vanapa Hall ah State Chief Information Commissioner Pu John Neihlaian a hawng.

He exhibition hi Mizoram Postal Divison - North East Circle buatsaih a ni a, ramchhunga hnam leh chi hrang hrangte tihdan leh nun dan phung te chawisan a, mipuite tana pholan na hun atan ruahhman a ni a, hei bakah hian Special cover - Nghaloh dawr – chu Pu John Neihlaia hian a tlangzarh nghal a.

Pu John Neihlaia chuan Nghahloh dawr special cover a tlangzarh tak chu a hlu in a that hle thu a sawi a, nghahloh dawr hi ram thenkhat ah awm ve mahse India ramah chuan Mizoram chauh hian an nei a , a danglamna leh a awmchhun a nih avang in a tha a tih hle thu a sawi a ni.

He exhibition ah hian stamp design in siamsak na buatsaih niin- category hnih a then a ni ang a, Open category leh Students Category pawl X chin tan siam niin - Open category ah hian Mizoram Cultural Heritage & Arts lam hmang in elna siam a ni ang a, Students Category ah hian - Science & technology lam a ni thung dawn a ni.



SESSION-SUPPLY MINISTER

Food Civil Supplies & Consumer Affairs minister Pu B Lalchhanzovan Mizoramah retailer zawng zawngten an term an hmang zo vek tur a ni tih chu an dinna a nih thu a sawi.

Assembly Session vawiina neih mekah zawhna chhangin Pu B Lalchhanzova chuan, ZPM sorkar a lo pian tirh khan retailer tumah an thlak lo a, an term an hmang zo vek tur a ni tih kha tuna an dinna a la nih reng thu sawiin, zawhna bik- MNF retailer engzah nge awm, INC retailer engzah nge, ZPM retailer engzahnge tih lam chu sorkarin a hriat loh thu a sawi a ni.

Supply Minister chuan, ZPM sorkar hnuah party inthliarna anga buhfai dawn theih dan categorization a awm thar thut a hriat loh thu a sawi a, ration dawn chu mitin chanvo, angin kalpui a ni a, ration card dil lo pawh khua leh tui an nih chuan automatic-in ration card an nei a, ration mamawh ve lote tih loh chuan automatic-in Fair Price Shop atangin buhfai an lak mai zel thu a sawi.

Food Civil Supplies & Consumer Affairs minister Pu B Lalchhanzova chuan Mizoramah furpui leh engemaw chhiatrupna a thlen palh pawha buhfai dahkhawlnaa harsatna a awm loh nan retailer ten hmun nghet neia buhfai an sem theihna tur hmun leh kudam ni pahfawm tur Permanent Fair Price Shop a tam thei ang ber siam an tum thu zawhna chhangin a sawi bawk a. Mizoramah buhfai dahna kudam 112 a awm mek thu sawiin, NABARD atangin Permanent Fair Price Shop sakna tur loan cheng vbc 5 an hmu a, tunah hian a bultan nan hmun 20-ah an sa dawn a, tah chuan a hmun a zirin quintal 100 te, quintal 80 te, quintal 150-te a leng dawn a, heta tang hian retailer-ten buhfai an sem thin dawn tih a sawi bawk.

